

Watu 200 wafa kwa mafuriko

ABUJA, Nigeria

KARIBU watu 200 wamefariki dunia nchini Nigeria kufuatia mafuriko ya wiki kadhaa.

Shirika la Kudhibiti Majanga la Nigeria, lilisema katika taarifa



yake Ijumaa iliyopita kwamba mafuriko hayo pia yameharibu hekta 107,000 za mashamba na kutishia zaidi usambazaji wa chakula hasa katika eneo lililoathiriwa zaidi la kaskazini.

Mamlaka zilionya kwamba mafuriko ya sasa yanaweza kuwa mabaya zaidi katika wiki zijazo na kuelekeza watu kuhama haraka katika maeneo kadhaa. VOA.

Israel yapata miili sita ya mateka Gaza

YERUSALEM, Israel

VIKOSI vya Israel vimefanikiwa kupata miili sita ya mateka wanaoshikiliwa na Hamas katika Ukanda wa Gaza.

Katika taarifa, Jeshi la



Ulinzi la Israel (IDF) lilisema miili hiyo ilipatikana mwishoni mwa wiki kwenye handaki la chini ya ardhini katika eneo la Rafah.

IDF iliwataja mateka hao kuwa ni Carmel Gat, Eden Yerushalmi, Hersh Goldberg-Polin, Alexander Lobanov, Almog Sarusi na Mwalimu Sgt Ori Danino. BBC.

Leo yetu ndiyo kesho yetu

Uelekeo

Vikosi vya Marekani vyaua wanachama 15 wa IS

WASHINGTON, Marekani

VIKOSI vya Kijeshi vya Marekani nchini Iraq, vimewaua "wanachama" 15 wa Islamic State (IS) katika operesheni ya pamoja na Vikosi vya Usalama vya Iraq

iliyolenga uongozi wa kundi hilo la wanamgambo.

Kamandi Kuu ya Marekani (Centcom), ilisema imefanya operesheni hiyo ya pamoja Magharibi mwa Iraq mapema Alhamisi iliyopita.

Wanajeshi wa Marekani na Iraq, walikutana na wanachama wa IS wakiwa na silaha nyingi, maguruneti na mikanda ya kujitua mhang'aa, ilisema katika taarifa. BBC.

| ISSN 2953-2787

| Bei Tanzania Sh. 1,000

| Jumatatu Septemba 2, 2024 |

Mbunge ashauri shule zitoze ada himilivu

Na Mwandishi Wetu

MBUNGE wa Bukene (CCM), Selemani Zedi, amezitaka shule nchini kutoza ada himilivu ili wanafunzi wengi wanaotoka familia zisizo na uwezo kupata fursa ya kusoma.

Aidha, ameipongeza Shule ya St. Anne Marie iliyoko eneo la Kimara kwa Msuguri jijini Dar es Salaam kwa kukubali kusomesha wanafunzi wanaofiwa na wazazi.

Alitoa wito huo mwishoni mwa wiki wakati wa mahafali ya 20 ya Shule ya Sekondari St. Anne Marie Academy.



Samia: JWTZ si jeshi la uvamizi

Na Mwandishi Wetu

RAIS na Amiri Jeshi Mkuu, Dk. Samia Suluhu Hassan, amesema Jeshi la Wananchi wa Tanzania (JWTZ), halina mpango wa kuvamia

nchi yoyote kwa kuwa ni jeshi la ulinzi na siyo la uvamizi.

"Jeshi letu limekuwa la ulinzi na siyo la uvamizi, hatujavamia nchi yoyote na hatuna mpango huo," amesema na kuongeza:

"Jeshi letu pia limekuwa jeshi la ukombozi na kioo katika

harakati za ukombozi wa Afrika na kulinda amani duniani."

Alisema hayo wakati akishiriki kilele cha Maadhimisho ya miaka 60 ya JWTZ yaliyofanyika Uwanja wa Uhuru jijini Dar es Salaam jana.

...aridhishwa na umahiri wa JWTZ

Na Mwandishi Wetu

RAIS na Amiri Jeshi Mkuu, Dk. Samia Suluhu Hassan, amesema anaridhika na umahiri wa hali ya juu wa Jeshi la Wananchi wa Tanzania (JWTZ) na anapata matumaini

makubwa kwamba kesho ya nchi na kesho ya watoto, ipo salama.

Alisema hayo wakati akishiriki kilele cha Maadhimisho ya miaka 60 ya JWTZ, yaliyofanyika Uwanja wa Uhuru jijini Dar es Salaam

jana.

"Ni matarajio yangu kwamba Jeshi letu litakuwa madhubuti zaidi, la kisasa na lenye zana na nyezo za kisasa zaidi," alisema na kuongeza, "zaidi ya hapo litadumu katika misingi ya kuanzishwa kwake."

Na Mohamed Saif, Zanzibar

RAIS Dk. Samia Suluhu Hassan, ametoa Sh. bilioni 77.9 kwa ajili ya kuwezesha utekelezaji wa miradi mbalimbali ya nishati safi ya kupikia.

Mkurugenzi wa Teknolojia za Nishati Jadidifu na Mbadala kutoka Wakala wa Nishati Vijijini (REA), Mhandisi Advera Mwijage, alisema

...amwaga Sh. bil. 77.9 nishati safi ya kupikia

haya hivi karibuni wakati wa Kongamano la Nishati Safi ya Kupikia Kizimkazi Dimbani, Mkoa wa Kusini Unguja.

"Serikali imeidhinisha kiasi hicho cha fedha ili kutekeleza zaidi ya miradi

tisa ya nishati safi ya kupikia itakayonufaisha kaya na taasisi mbalimbali za umma na katika fedha hizo jumla ya Sh. bilioni 16, ni mchango kutoka kwa wabia wa maendeleo.

rifaly

Habarika kidijitali! Soma gazeti la Uelekeo ndani ya Rifaly!



Scan to download Rifaly

www.rifaly.com



Leo yetu ndiyo kesho yetu

Suelekeo Spoti

| Jumatatu Septemba 2, 2024 |

Zahera atupiwa 'virago' Namungo

Na Mwandishi Wetu

BAADA ya kupoteza mechi mbili mtawalia na Afisa Mtendaji Mkuu wa klabu, Omari Kahaya kujiuzulu, uongozi wa klabu ya Namungo umevunja benchi la ufundi hivyo kumuachisha kazi kocha Mwinyi Zahera kutoka



Congo DR.

Badala yake imeelezwa kuwa, sasa uongozi wa Namungo upo kwenye maongezi na kocha wa Simba Queens, Juma Mgunda achukue mikoba hiyo ya Zahera akisaidiana na Ngawina Ngawina ambaye ni kocha msaidizi wa Coastal Union.

Coastal Union wao wamemuajiri kocha Dominique Niyonzima kutoka Burundi na aliyekuwa kocha wa Mtibwa Sugar, Zubeir Katwila kuchukua nafasi ya Mkenya, David Ouma aliyefutwa kazi na Ngawina anayeenda Namungo.

Chelsea yainasa saini ya Sancho

LONDON, England

HATIMAYE klabu ya Chelsea wamekamlisha rasmi usajili wa Jadon Sancho kutoka Manchester United.

Mwanzo iliaminika inaweza kuwa safari mpya ya Jadon Sancho baada ya kurejea Manchester United na kuonekana na katika mazoezi ya maandalizi ya msimu mpya na kikosi hicho.



Baada ya Msimu kuanza rasmi jina la Sancho halikuwahi kuonekana kwenye kikosi cha Manchester United au hata benchini moja ya sababu ni kuwa alikuwa bado hana maelewano mazuri na Kocha Ten Hag na sasa rasmi ni mchezaji wa Chelsea.

Eng. Hersi aomba Serikali itupie jicho miundombinu

Na Mwandishi Wetu

RAIS wa Klabu ya Yanga Eng. Hersi Ally Said ametumia jukwaa la michuano ya Kombe la Ndondo kumuomba Rais, Dk. Samia Suluhu Hassan kuendelea kusaidia na kuunga mkono ukuaji wa michezo nchini.

Akizungumza baada ya mchezo wa fainali kati ya Azimio FC dhidi ya Soccer City, Hersi amemuomba Rais kugeukia upande wa miundombinu kama viwanja ili kufanya mchezo wa mpira uchezwe kwenye mazingira rafiki zaidi.

"Mimi haya ndiyo maisha yangu nimecheza sana na mtu aliyefunga goli la pili Abdallah 'Dulla' Seseme nilicheza naye lakini alikuwa ni mdogo sana wakati huo na alikuwa na kipaji

kikubwa sana, sasa hivi anacheza Tabora United, lakini alicheza Kagera Sugar kwa muda mrefu, alicheza pia Simba na sisi tulikuwa tunamuita Hugo," alibainisha Eng. Hersi.

Rais huyo wa Yanga ameendelea kummwagia sifa Sesame na kupasha kuwa, ni moja ya kipaji bora ambacho kilikuwa kinaonekana tangu akiwa mdogo na wakati wanacheza Ilala, kocha wao Mzee Hugo alikiona kipaji chake tangu wakati huo.

"Niwapongeze Ndondo Cup kwa sababu hii michuano inawaleta vijana kutoka mtaani na kuja kuonyesha vipaji vyao na hivi ndivyo viwango bora vilivyopo mitaani," amesifu Injiniya Hersi.

Hersi anatanabahisha kuwa, ni vigumu kwa viongozi wa klabu

mbalimbali kuwaona moja kwa moja wachezaji hawa, lakini kupitia Ndondo Cup ndiyo wanapata hiyo fursa ya kushuhudia vipaji vingi.



Wydad wakubali yaishie kwa Mzizie

Gamondi asali nyota wake wasiumie timu za taifa

Na Mwandishi Wetu

KLABU ya Wydad Casablanca ya Morocco wameweka mikono juu na kukubali wameshindwa kumnasa mshambuliaji wa Yanga, Clement Mzize na sasa dili limekufa rasmi.

Baada ya majaribio matatu ya kuinasa saini ya Mzize kugonga mwamba, Wydad Casablanca wameamua kutoendelea na biashara hiyo tena.

Habari kutoka ndani ya Yanga zimebainisha kuwa, ofa ya mwisho ya Wydad ilifikia bilioni 1.9, lakini pia inadaiwa waliongeza bonasi ya Yanga kwenda kuweka kambi ya maandalizi ya msimu ujao nchini Morocco ambayo Wananchi wangelipia tiketi za ndege peke yake na kila kitu kilichobakia Wydad Casablanca wangesimamia.

Pia Wydad Casablanca waliweka ofa nyingine ya kukubali kuja kucheza kwenye Siku ya Wananchi msimu ujao lakini zote zimepigwa chini na uongozi wa Yanga kwa maelezo mafupi tu; "Clement

Mzize hauzwi!"

Katika hatua nyingine, katika kipindi hiki Ligi Kuu ya NBC ikiwa imesimama kwa wiki mbili kupisha mechi za kimataifa za kalenda ya FIFA, kocha mkuu wa Yanga, Miguel Gamondi amesema anaomba nyota wake 14 walioitwa timu za taifa warudi salama ili waendeleze mkakati wa kutetea ubingwa inaoushikilia kwa msimu wa tatu mfululizo.

Mara baada ya mechi za timu za taifa zitakapomalizika na ligi kurejea, Yanga itakuwa na kibarua cha michuano ya CAF ikitakiwa kuvaana na CBE SA ya Ethiopia katika raundi ya pili ya Ligi ya Mabingwa Afrika, kitu ambacho Gamondi ameanza kupiga hesabu zake akisaka tiketi ya makundi ya mara ya pili mfululizo.

Kikosi hicho kilianza msimu kwa kubeba Ngao ya Jamii kwa kuzishinda Simba 1-0 na Azam 4-1 kisha kuing'oa Vital'O ya Burundi kwa ushindi wa jumla wa mabao 10-0 katika mechi mbili za Ligi ya Mabingwa Afrika kabla ya kuifumua Kagera Sugar mabao 2-0 katika mchezo wa Ligi Kuu Bara.



Bamba afariki dunia

ADANA, Uturuki

HABARI za kusikitisha usiku wa juzi ni kifo cha beki wa zamani wa Leicester City, Leeds United na Cardiff City, Souleymane Bamba aliyepoteza maisha Agosti 31, 2024 akiwa na umri wa miaka 39.

Bamba raia wa Ivory Coast ambaye alikuwa kocha wa klabu ya Adanaspor inayoshiriki Ligi Kuu ya hapa nchini Uturuki, amefariki baada ya kuugua ghafla.

Taarifa ya klabu imesema; "Mkurugenzi wetu wa ufundi Souleymane Bamba, ambaye aliugua kabla ya mechi yetu dhidi ya Manisa iliyochezwa jana (juzi), alipelekwa katika Hospitali ya Chuo Kikuu cha Manisa Celal Bayar na kwa bahati mbaya akapoteza maisha."

Bamba ambaye alianza makazi yake ya soka kunako klabu ya PSG pia amewahi kuitumikia klabu ya Middlesbrough katika miaka yake 18 ya kusakata kabumbu akicheza jumla ya mechi 423.